



楚辭跋

予聞之李本寧先生云楚有二義沈湮
沈湮章皇蠻貊而不可方物者爲楚文
采陸離璘璣而意態便嫻幻眇者爲楚
豈鬱憤蕙悽愴結情纏綿而篤至者爲
楚楚辭之名亦不第以楚人語而楚之
實其辭之意有足爲楚者故今蔣石林

讀之輒自喜遂日鐫而夕次焉令其所
以爲楚者益明一發簡覺瞭然若指掌
又林然若列環寶于市而探之也

社弟陸鈿撰



楚辭附覽卷上

漢本楚辭載諫懷嘆思四篇朱子刪之謂其無病呻
吟是矣柰讀者罔聞其說猶抱遺珠之痛予聊附之
篇外以備覽云天啓丙寅冬蔣之翹識

七諫

王逸曰七諫者東方朔之所作也諫者正也謂陳法
度以諫正君也古者人君三諫不從退而待放屈原
與楚同姓無相去之義故加爲七諫慤懃之意忠厚
之節也或曰七諫者法天子有爭臣七人也東方朔

追憫屈原故作此辭以述其志所以昭忠信矯曲朝也

平生於國兮長於原
壘言語訥謔兮又無疆輔淺智褊能兮聞見又寡數言便事兮見怨門下王不察其長利兮卒見棄乎原
壘伏念思過兮無可改者羣衆成朋兮上浸以惑巧佞在前兮賢者滅息堯舜聖已沒兮孰爲忠直高山崔嵬兮水流湯湯死日將至兮與麋鹿同坑塊鞠兮當道宿舉世皆然兮余將誰告斥逐鴻鵠兮近習鴟梟斬伐橘柚兮列樹苦桃便娟之修竹兮寄生乎江潭上歲蕤而防露兮下泠泠而來風孰知其不合兮若竹柏之異心往者不可及兮來者不可待悠悠蒼天兮莫我振理竊怨君之不寤兮吾獨死而後已

右初放

惟往古之得失兮覽私微之所傷堯舜聖而慈仁兮後世稱而弗忘齊桓失於專任兮夷吾忠而名彰晉獻惑於驪姬兮申生孝而被殃偃王行其仁義兮荆文寤而徐亾紂暴虐以失位兮周得佐乎呂望修往古以行恩兮封比干之丘隴賢俊慕而自附兮日浸淫而合同明

法令而修理兮蘭芷幽而有芳苦衆人之妬余兮箕子
寤而佯狂不顧地以貪名兮心怫鬱而內傷聯蕙芷以
爲佩兮過鮑肆而失香正臣端其操行兮反離謗而見
攘世俗更而變化兮伯夷餓於首陽獨廉潔而不容兮
叔齊久而逾明浮雲陳而蔽晦兮使日月乎無光忠臣
貞而欲諫兮讒諛毀而在旁秋草榮其將實兮微霜下
而夜降商風肅而害生兮百草育而不長衆並諧以妬
賢兮孤聖特而易傷懷計謀而不見用兮巖穴處而隱
藏成功隳而不卒兮子胥死而不葬世從容而變化兮

隨風靡而成行信直退而毀敗兮虛僞進而得當追悔
過之無及兮豈盡忠而有功廢制度而不用兮務行私
而去公終不變而死節兮惜年齒之未央將方舟而下
流兮冀幸君之發矇痛忠言之逆耳兮恨申子之沈江
願悉心之所聞兮遭值君之不聰不開寤而難道兮不
別橫之與縱聽奸臣之浮說兮絕國家之久長滅規渠
而不用兮背繩墨之正方離憂患而乃寤兮若縱火於
秋蓬業失之而不救兮尚何論乎禍凶彼離畔而朋黨
兮獨行之士其何望日漸染而不自知兮秋毫微哉而

變容衆輕積而折軸兮原咎雜而累重赴湘沅之流澌
兮恐逐波而復東懷沙礫而自沈兮不忍見君之蔽壅

右沈江

世沈淖而難論兮俗吟峨而嶮嗟清泠泠而殲滅兮溷
湛湛而日多梟鴞旣以成羣兮玄鶴弭翼而屏移蓬艾
親入御於牀第兮馬蘭踈蹕而日加棄捐葑芷與杜蘅
兮余柰世之不知芳何何周道之平易兮然蕪穢而險
戲高陽無故而委塵兮唐虞黜灼而毀議誰使正其真
是兮雖有八師而不可爲皇天保其高兮后土持其久

服清白以逍遙兮偏與乎玄英異色西施媸媸而不得
見兮萋母勃屑而日侍桂蠹不知所淹留兮蓼蟲不知
徙乎葵菜處潛潛之濁世兮今安所達乎吾志意有所
載而遠逝兮固非衆人之所識驥躡蹻於弊輦兮遇孫
陽而得代呂望窮困而不聊生兮遭周文而舒志寧戚
飯牛而商歌兮桓公聞而弗置路室女之方桑兮孔子
過之以自持吾獨乖刺而無當兮心悼怵而耄思思比
干之悒悒兮哀子胥之慎事悲楚人之和氏兮獻寶玉
以爲石遇厲武之不察兮羗兩足以畢斲小人之居勢

兮視忠正之何若改前聖之法度兮喜躡嚙而妄作親
讒諛而疏賢聖兮訟謂閻姬爲醜惡偷近習而蔽遠兮
孰知察其黑白卒不得效其心容兮安眇眇而無所歸
薄專精爽以自明兮晦冥冥而壅蔽年旣已過太半兮
然輜軻而留滯欲高飛而遠集兮恐離罔而滅敗獨寃
抑而無極兮傷精神而壽天皇天旣不純命兮余生終
無所依願自沈於江流兮絕橫流而徑逝寧爲江海之
泥塗兮安能久見此濁世

右怨世

賢士窮而隱處兮廉方正而不容子胥諫而靡軀兮比
干忠而剖心子推自剖而飮君兮德日忘而怨深行明
白而曰黑兮荆棘聚而成林江離棄於窮巷兮蒺藜蔓
乎東廂賢者蔽而不見兮讒諛進而相朋臬鴉並進而
俱鳴兮鳳皇飛而翱翔願壹往而徑逝兮道壅絕而不
通

右怨思

居愁懃其誰告兮獨永思而憂悲內自省而不慙兮操
愈堅而不衰隱三年而無決兮歲忽忽其若頽憐余身

不足以卒意兮冀一見而復歸哀人事之不幸兮屬天命而委之咸池身被疾而不閉兮心沸熱其若湯米炭不可以相並兮吾固知乎命之不长哀獨苦死之無樂兮惜余年之未央悲不得反余之所居兮恨離余之故鄉鳥獸驚而失羣兮猶高飛而哀鳴狐死必首丘兮夫人孰能不反其真情故人疏而日忘兮新人近而俞好莫能行於杳冥兮孰能施於無報苦衆人之皆然兮乘回風而遠遊凌恒山其若陋兮聊愉娛以忘憂悲虛言之無實兮苦衆口之鑠金過故鄉而一顧兮泣欷歔而

霑衿厭白玉以爲面兮懷琬琰以爲心邪氣入而感肉兮施玉色而外淫何青雲之流瀾兮微霜降之蒙蒙徐風至而徘徊兮疾風過之湯湯聞南藩樂而欲往兮至會稽而且止見韓衆而宿之兮問天道之所在借浮雲以送余兮載雌霓而爲旌駕青雲以馳騫兮班衍衍之冥冥忽容容其安之兮超慌忽其焉如苦衆人之難信兮願離羣而遠舉登巒山而遠望兮好桂樹之冬榮觀天火之炎煬兮聽大壑之波聲引八維以自道兮合沆瀣以長生居不樂以時思兮食草木之秋實飲菌若之

朝露兮構桂木而爲室雜橘柚以爲園兮列新夷與椒
楨鴟鶴孤而夜號兮哀居者之誠貞

右自悲

哀時命之不合兮傷楚國之多憂內懷情之潔白兮遭
亂世而離尤惡耿介之直行兮世溷濁而不知何君臣
之相失兮上沅湘而分離測汨羅之湘水兮知時固而
不反傷離散之交亂兮遂側身而旣遠處玄舍之幽門
兮穴巖石而窟伏從水蛟而爲徒兮與神龍乎休息何
山石之嶄巖兮靈寃屈而偃蹇含素水而蒙深兮日眇

眇而旣遠哀形體之離解兮神罕兩而無舍惟椒蘭之
不反兮寃迷惑而不知路願無過之設行兮雖滅沒之
自樂痛楚國之流亡兮哀靈修之過到固時俗之溷濁
兮志瞖迷而不知路念私門之正匠兮遙涉江而遠去
念女嬃之嬋媛兮涕泣流乎於悒我決死而不生兮雖
重追吾何及戲疾瀨之素水兮望高山之蹇產哀高丘
之赤岸兮遂沒身而不反

右哀命

怨靈修之浩蕩兮夫何執操之不固悲太山之爲隍兮

孰江河之可涸願承閔而效志兮恐犯忌而干諱卒撫
情以寂寞兮然怊悵而自悲玉與石而同價兮貫魚眼
與珠璣駑駘雜而不分兮服罷牛而驂驥年滔滔而日
遠兮壽冉冉而愈衰心怵憚而煩寃兮蹇超搖而無冀
固時俗之工巧兮滅規榘而改錯却騏驥而不乘兮策
駑駘而取路當世豈無騏驥兮誠無王良之善馭見執
轡者非其人兮故駒跳而遠去不量鑿而正柎兮恐榘
矧之不同不論世而高舉兮恐操行之不調弧弓弛而
不張兮孰云知其所至無傾危之患難兮焉知賢士之

所死俗推佞而進富兮節行張而不著賢良蔽而不羣
兮朋曹比而黨譽邪枉說飾而多曲兮正法弧而不公
直士隱而辟匿兮讒諛登乎明堂棄彭咸之娛樂兮滅
巧僂之繩墨菑落雜於廢蒸兮機蓬矢以射革駕蹇驢
而無策兮又何路之能極以直鍼而爲釣兮又何魚之
能得伯牙之絕弦兮無鍾子期而聽之和抱璞而泣血
兮安得良工而剖之同音者相和兮同類者相似飛鳥
號其羣兮鹿鳴求其友故叩宮而宮應兮彈角而角動
虎嘯而谷風至兮龍舉而景雲往音聲之相和兮言物

類之相感也夫方圓之異形兮勢不可以相錯列子隱
身而窮處兮世莫可以寄託衆鳥皆有行列兮鳳獨翺
翔而無所薄經濁世而不得志兮願側身巖穴而自託
欲闔口而無言兮嘗被君之厚德獨便愔而懷毒兮愁
鬱鬱之焉極念三年之積思兮願壹見而陳詞不及君
而騁說兮世孰可爲明之身寢疾而日愁兮情沈抑而
不揚衆人莫可與論道兮悲精神之不通

右謬諫

亂曰鸞皇孔鳳日以遠兮畜鳧駕鵝雞鶩滿堂壇兮鼉

鼉游乎華池要褭奔亡兮騰駕橐駝鉞刀進御兮遙棄
太阿拔搴玄芝兮列樹芋荷橘柚委枯兮苦李旖旎
甌登於明堂兮周鼎潛乎深淵自古而固然兮吾又何
怨乎今之人

九懷

王逸曰九懷者諫議大夫王褒之所作也懷者思也
言屈原雖見放逐猶思念其君憂國傾危而不能忘
也褒讀屈原之文嘉其溫雅藻采敷衍執握金玉委
之污瀆遭世溷濁莫之能識追而愍之故作九懷以

裨其詞史官錄第遂列于篇

極運兮不中來將屈兮困窮余深愍兮慘怛願一列兮
無從乘日月兮上征顧遊心兮鄙艷彌覽兮九隅彷彿
兮蘭宮芷閭兮葯房奮搖兮衆芳菌閣兮蕙樓觀道兮
從橫寶金兮委積美玉兮盈堂桂水兮潺湲揚流兮洋
洋著蔡兮踴躍孔鶴兮回翔撫檻兮遠望念君兮不忘
怫鬱兮莫陳永懷兮內傷

右匡機

天門兮墜戶孰由兮賢者無正兮溷廁懷德兮何覩假

寐兮愍斯誰可與兮寤語痛鳳兮遠逝畜鴟兮近處鯨
鱗兮幽潛從鰕兮遊階乘虬兮吞陽載象兮上行朝發
兮蔥嶺夕至兮明光北飲兮飛泉南采兮芝英宣遊兮
列宿順極兮彷彿紅采兮駢衣翠縹兮爲裳舒佩兮緜
纒竦余劔兮干將騰蛇兮後從飛駟兮步旁微觀兮玄
圃覽察兮瑤光啓匱兮探筴悲命兮相當紉蕙兮永辭
將離兮所思浮雲兮容與道余兮何之遠望兮仟眠聞
雷兮闐闐陰憂兮感余惆悵兮自怜

右通路

林不容兮鳴蜩余何留兮中州陶嘉月兮總駕攀玉英
兮自修結榮蔭兮逶迤將去烝兮遠遊徑岱土兮魏闕
歷九曲兮牽牛聊假日兮相伴遺光燿兮周流望太一
兮淹息紆余轡兮自休晞白日兮皎皎彌遠路兮悠悠
顧列字兮縹縹觀幽雲兮陳浮鉅寶遷兮砢礪雉咸雒
兮相求泱莽莽兮究志懼吾心兮憺憺步余馬兮飛柱
覽可與兮匹儔卒莫有兮纖介末余思兮怵怵

右危俊

世溷兮冥昏違君兮歸真乘龍兮偃蹇高回翔兮上臻

襲英衣兮緹縹披華裳兮芳芬登羊角兮扶輿浮雲漠
兮自娛握精神兮雍容與神人兮相胥流星墜兮成雨
進隣盼兮上丘墟覽舊邦兮滃鬱余安能兮久居志懷
逝兮心慟慄紆余轡兮躊躇聞素女兮微歌聽王后兮
吹竽竄悽愴兮感哀腸回回兮盤紆撫余佩兮繽紛高
太息兮自憐使祝融兮先行令昭明兮開門馳六蛟兮
上征竦余駕兮入冥歷九州兮索合誰可與兮終生忽
反顧兮西園覩軫丘兮崎傾橫垂涕兮泣流悲余后兮
失靈

右昭世

季春兮陽陽列草兮成行余悲兮蘭生委積兮從橫江
離兮遺捐辛夷兮擠臧伊思兮在古亦多兮遭殃伍胥
兮浮江屈子兮沈湘運余兮念茲心內兮懷傷望淮兮
沛沛濱流兮則逝榜舫兮下流東注兮磕磕蛟龍兮導
引文魚兮上瀨抽蒲兮陳坐援芙蓉兮爲蓋水躍兮余
旌繼以兮微蔡雲旗兮電鷲儵忽兮容喬河伯兮開門
迎余兮歡欣顧念兮舊都懷恨兮艱難竊哀兮浮萍汎
滢兮無根

右尊嘉

秋風兮蕭蕭舒芳兮振條微霜兮眇眇病歿兮鳴蜩玄
鳥兮辭歸飛翔兮靈丘望谿兮滃鬱熊羆兮响嗥唐虞
兮不存何故兮久畱臨淵兮汪洋顧林兮忽荒修余兮
袿衣騎霓兮南上乘雲兮回回疊疊兮自強將息兮蘭
臯失志兮悠悠紛蘊兮徽黻思君兮無聊身去兮意存
愴恨兮懷愁

右蓄英

登九靈兮遊神靜女歌兮微晨悲皇丘兮積葛衆體錯

兮交紛貞枝抑兮枯槁枉車登兮慶雲感余志兮慘慄
心愴愴兮自憐駕玄螭兮北征尋吾路兮蔥嶺連五宿
兮建旄揚氛氣兮爲旌歷廣漠兮馳騫覽中國兮冥冥
玄武步兮水母與吾期兮南榮登華蓋兮乘陽聊逍遙
兮播光抽庫婁兮酌醴援炮瓜兮接糧畢休息兮遠逝
發玉軻兮西行惟時俗兮疾正弗可久兮此方寤辟標
兮永思心怫鬱兮內傷

右思忠

覽杳杳兮世惟余惆悵兮何歸傷時俗兮溷亂將奮翼

兮高飛駕八龍兮連蜷建虹旌兮威夷觀中宇兮浩浩
紛翼翼兮上躋浮溺水兮舒光淹低徊兮京汴屯余車
兮索友覩皇公兮問師道莫遺兮歸真羨余術兮可夷
吾乃逝兮南娛道幽路兮九疑越炎火兮萬里過萬首
兮嶮嶮濟江海兮蟬蛻絕北梁兮永辭浮雲鬱兮晝昏
霾土忽兮塵塵息陽城兮廣夏衰色罔兮中息意曉陽
兮燎寤乃息軫兮存茲思堯舜兮襲興幸咎繇兮獲謀
悲九州兮靡君撫軾歎兮作詩

右陶壅

悲哉于嗟兮心內切嗟欵冬而生兮凋彼葉柯瓦礫進
寶兮捐棄隨和鉛刀厲御兮頓棄大阿驥垂兩耳兮中
坂蹉跎蹇驢服駕兮無用日多修潔處幽兮貴寵沙磨
鳳皇不翔兮鶉鷄飛揚乘虹驂蜺兮載雲變化鷦鷯開
路兮後屬青蛇步驟桂林兮超驤卷阿丘陵翔舞兮谿
谷悲歌神童靈篇兮赴曲相和余私娛茲兮孰哉復加
還顧世俗兮壞敗罔羅卷佩將逝兮涕流滂沱

右株昭

亂曰皇門開兮照下土株穢除兮蘭芷覩四佞放兮後

得禹聖舜攝兮昭堯緒孰能若兮願爲輔

楚辭附覽卷上終

楚辭附覽卷下

九歎

王逸曰九歎者護左都水使者光祿大夫劉向之所作也向以博古敏達典校經書辯章舊文追念屈原忠信之節故作九歎歎者傷也息也言屈原放在山澤猶傷念君歎息無已所謂讚賢以輔志騁詞以曜德者也

伊伯庸之末胄兮諒皇直之屈原云余肇祖于高陽兮惟楚懷之嬋連原生受命于貞節兮鴻永路有嘉名齊

名字於天地兮並光明於列星吸精粹而吐氛濁兮橫
邪世而不取容行叩誠而不阿兮遂見排而逢讒后聽
虛而黜實兮不吾理而順情腸憤悁而含怒兮志遷蹇
而左傾心懍慌而不我與兮躬速速而不吾親辭靈脩
而隕意兮吟澤畔之江濱椒桂羅以顛覆兮有竭信而
歸誠讒夫藹藹而曼著兮曷其不舒予情始結言於廟
堂兮信中塗而叛之懷蘭蕙與蘅芷兮行中壑而散之
聲哀哀而懷高丘兮心愁愁而思舊邦願承問而自恃
兮徑淫曠而道塵顏黴黧以沮敗兮精越裂而衰耄裳

襜襜而含風兮衣納納而掩露赴江湘之湍流兮順波
湊而下降徐徘徊於山阿兮飄風來之洶洶馳余車兮
玄石步余馬兮洞庭平明發兮蒼梧夕投宿兮石城芙
蓉葢下而凌華車兮紫貝闕而玉堂薜荔飾而陸離薦兮
魚鱗衣而白蜺裳登逢龍而下隕兮違故都之漫漫思
南郢之舊俗兮腸一夕而九運揚流波之潢潢兮體溶
溶而東回心怊悵以永思兮意晻晻而自頽白露紛紛
以塗塗兮秋風瀏瀏以蕭蕭身永流而不還兮魂長逝
而常愁

歎曰譬彼流水紛揚磴兮波逢洶涌紛滂沛兮揄揚滌
盪漂流隕往觸岑石兮龍叩將圈繚戾宛轉阻相薄兮
遭紛逢凶蹇離尤兮垂文揚采遺將來兮

右逢紛

靈懷其不吾知兮靈懷其不吾聞就靈懷之皇祖兮懇
靈懷之鬼神靈懷曾不吾知兮卽聽夫讒人之諛辭余
辭上參於天墜兮旁引之於四時指日月使延照兮撫
招搖以質正立師曠俾端詞兮命咎繇使並聽兆出名
曰正則兮封發字曰靈均余幼既有此鴻節兮長愈固

而彌純不從俗而詖行兮直躬指而信志不枉繩以追
曲兮屈情素以從事端余行其如玉兮述皇輿之踵跡
羣阿容以晦光兮皇輿覆以幽辟輿中塗以回畔兮駟
馬驚而橫犇執組者不能制兮必折軛而摧轅斷鑣銜
以馳驚兮暮去次而敢止路蕩蕩其無人兮遂不禦乎
千里身衡陷而下沈兮不可獲而復登不顧身之卑賤
兮惜皇輿之不興出國門而端指兮方冀壹寤而錫還
哀僕夫之坎毒兮屢離憂而逢患九年之中不吾反兮
思彭咸之水遊惜師延之浮渚兮赴汨羅之長流遵曲

江之逶移兮觸石碣而衝遊波澧澧而揚澆兮順長瀨
之濁流淩黃沱而下低兮思還流而復反玄輿馳而並
集兮身容與而日遠權舟杭以橫瀟兮滢湘流而南極
立江界而長吟兮愁哀哀而累息情慌忽以忘歸兮神
浮遊以高厲志蛩蛩而懷顧兮覓眷眷而獨逝
歎曰余思舊邦心依違兮日暮黃昏嗟幽悲兮去郢東
遷余誰暮兮讒夫黨旅其以茲故兮河水淫淫情所願
兮顧瞻郢路終不返兮

右靈懷

惟鬱鬱之憂毒兮志坎壈而不違身憔悴而考旦兮日
黃昏而長悲閔空宇之孤子兮哀枯楊之寃鷓孤雌吟
於高墉兮鳴鳩棲於桑榆玄蟻失於潛林兮獨偏棄而
遠放征夫勞於周行兮處婦憤而長望申誠信而罔違
兮情素潔於紉帛光明齊於日月兮文采耀於玉石傷
壓次而不發兮思沈抑而不揚芳懿懿而終敗兮名糜
散而不彰背玉門以犇騫兮蹇離尤而干詬若龍逢之
沈首兮王子比干之逢醢念社稷之幾危兮反爲讐而
見怨思國家之離沮兮躬獲愆而結難若青蠅之僞質

兮晉驪姬之反情恐登階之逢殆兮故退伏於未庭孽
子之號咷兮本朝蕪而不治犯顏色而觸諫兮反蒙辜
而被疑苑薜蘿與茵若兮漸藁本於溇瀆淹芳芷於腐
井兮弄雞駭於筐籠執棠谿以荆蓬兮秉干將以割肉
筐澤瀉以豹鞞兮破荆和以繼築時溷濁猶未清兮世
殺亂猶未察欲容與以俟時兮懼年歲之旣晏顧屈節
以從流兮心鞏鞏而不夷寧浮沉而馳騁兮下江湘以
道迴

歎曰山中檻檻余傷懷兮征夫皇皇其孰依兮經營原
野杳冥冥兮乘騏驎舒吾情兮歸骸舊邦莫誰語兮
長辭遠逝乘湘去兮

右離世

志隱隱而鬱怫兮愁獨哀而寃結腸紛紜以繚轉兮涕
漸漸其若屑情慨慨而長懷兮信上皇而質正合五嶽
與八靈兮訊九魁與六神指列宿以白情兮訴五帝以
置詞北斗爲我質中兮太一爲余聽之云服陰陽之正
道兮御后土之中和佩蒼龍之蚬虬兮帶隱虹之透虵
曳彗星之皓肝兮撫朱爵與鷄鸚遊青霧之颯戾兮服

雲衣之披披杖玉策與朱旗兮垂明月之玄珠舉霓旌
之帶翳兮建黃昏之總旄躬純粹而罔愆兮承皇考之
妙儀惜往事之不合兮橫汨羅而下厲乘隆波而南度
兮逐江湘之順流赴陽侯之潢洋兮下石瀨而登洲陸
閔而迫身雪雰雰而薄木兮雲霏霏而隕集阜隘狹而
幽險兮石嶮嗟以翳日悲故鄉而發忿兮去余邦之彌
久背龍門而入河兮登大墳而望夏首橫舟航而濟湘
兮耳聊嗽而懍慌波淫淫而周流兮鴻溶溢而滔蕩路
曼曼其無端兮周容容而無識引日月以指極兮少須
臾而釋思水波遠以冥冥兮眇不睹其東西順風波以
南北兮霧宵晦以紛闇日杳杳以西頽兮路長遠而窘
迫欲酌醴以娛意兮蹇騷騷而不釋
歎曰飄風蓬龍埃拂拂兮草木搖落時槁悴兮遭傾遇
禍不可救兮長吟永歎涕煢煢兮舒情敝詩冀以自免
兮頽流下逝身日以遠兮

右怨思

悲余性之不可改兮屢懲艾而不返服覺酷以殊俗兮

貌揭揭以巍巍譬若王僑之乘雲兮載赤霄而凌太清
欲與天地參壽兮與日月而比榮登崑崙而北首兮悉
靈囿而來謁選鬼神於太陰兮登閭闔於玄闕回朕車
俾西引兮褰虹旗於玉門馳六龍於三危兮朝四靈於
九濱結余軫於西山兮橫飛谷以南征絕都廣以直指
兮歷祝融於朱冥在玉衡於炎火兮委兩館於咸唐貫
頽濛以東竭兮維六龍於扶桑周流覽於四海兮志升
降以高馳徵九神於回極兮建虹采以招指駕鸞鳳以
上遊兮從玄鶴與鷦朋孔鳥飛而送迎兮騰羣鶴於瑤

光排帝宮與羅囿兮升縣圃以眩滅結瓊枝以雜佩兮
立長庚以繼日凌驚雷以軼駭電兮綴鬼谷於北辰鞭
風伯使先驅兮囚靈玄於虞淵愬高風以徘徊兮覽周
流於朔方就顛頊而隲詞兮考玄冥於空桑旋車逝於
崇山兮奏虞舜於蒼梧滄楊舟於會稽兮就申胥於五
湖見南郢之流風兮殞余躬於沅湘望舊邦之黯黯兮
時溷濁猶未央懷蘭茝之芬芳兮妬被離而折之張絳
帷以襜襜兮風邑邑而蔽之日暎暎其西舍兮陽炎炎
而復顧聊假日以須臾兮何騷騷而自故

歎曰譬彼蛟龍乘雲浮兮汎滢瀕溶紛若霧兮潺湲輻
輳雷動電發馭高舉兮升虛凌冥沛獨浮清入帝宮兮
搖翹奮羽馳風騁雨遊無窮兮

右遊逝

覽屈氏之離騷兮心哀哀而怫鬱聲嗷嗷以寂寥兮顧
僕夫之憔悴撥諂諛而匡邪兮切澠沁之流俗盪漚淩
之姦咎兮夷蠹蠹之溷濁懷芬香而挾蕙兮佩江離之
菲菲握申椒與杜若兮冠浮雲之峨峨登長陵而四望
兮覽芷圃之蠡蠡遊蘭皋與蕙林兮睨玉石之嶮嵯揚

精華以眩耀兮芳鬱渥而純美結桂樹之旖旎兮紉荃
蕙與辛夷芳若茲而不御兮捐林薄而苑苑驅子僑之
犇走兮申徒狄之赴淵若夷由之純美兮介于推之隱
山晉申生之離殃兮荆和氏之泣血吳子胥之抉眼兮
王子比干之橫廢欲卑身而下體兮心隱惻而不置方
圓殊而不合兮鈎繩用而異態欲埃時於須臾兮日陰
曠其將暮時遲遲其日進兮年忽忽而日度妄周容而
入世兮內距閉而不開埃時風之清激兮愈氛霧其如
塵進雄鳩之耿耿兮讒紛紛而蔽之默順風以偃仰兮

尚由由而進之心憤恨以寃結兮情舛錯以曼曼奪薛
荔於山野兮采撷枝於中州望高丘而歎涕兮悲吸吸
而長懷孰契契而委棟兮日晡晡而下頽
歎曰油油江湘長流汨兮挑揄揚波盪迅疾兮憂心展
轉愁怫鬱兮寃結未舒長隱忿兮丁時逢殃孰可柰何
兮勞心涓涓涕滂沱兮

右惜賢

悲余心之悄悄兮哀故邦之逢殃辭九年而不復兮獨
煢煢而南行思余俗之流風兮心紛錯而不受遵野莽

以呼風兮步從容於山藪巡陸夷之曲衍兮幽空虛以
寂寞倚石巖以流涕兮憂憔悴而無樂登嶢峴以長企
兮望南郢而闕之山修遠其遼遼兮塗漫漫其無時聽
玄鶴之晨鳴兮于高岡之峨峨獨憤積而哀娛兮翔江
洲而安歌三鳥飛飛以自南兮覽其志而欲北願寄言
於三鳥兮去飄疾而不可得欲遷志而改操兮心紛結
而未離外彷徨而遊覽兮內惻隱而含哀聊須臾以時
志兮心漸漸其煩錯願假簧以舒憂兮志紆鬱其難釋
歎離騷以揚意兮猶未殫於九章長嘘吸以於悒兮涕

橫集而成行傷明珠之赴泥兮魚眼璣之堅藏同鴛羸
與乘駟兮雜班駁與鬪葺葛藟蘩於桂樹兮鴟鴞集於
木蘭偃促談於廊廟兮律魁放乎山間惡虞氏之簫韶
兮好遺風之激楚潛周鼎於江淮兮爨土鬻於中宇且
人心之有舊兮而不可保長遭彼南道兮以征夫宵行
思念郢路兮還顧睠睠涕流交集兮泣下漣漣
歎曰登山長望中心悲兮苑彼青青泣如頽兮畱思北
顧涕漸漸兮折銳摧矜凝汜濫兮念我笑笑覓誰求兮
僕夫慌悴散若流兮

右憂苦

昔皇考之嘉志兮喜登能而亮賢情純潔而罔歲兮姿
盛質而無愆放佞人與諂諛兮斥讒夫與便嬖親忠正
之惓誠兮招貞良與明智心溶溶其不可量兮情澹澹
其若淵回邪辟而不能入兮誠願藏而不可遷逐下秩
於後堂兮遯宓妃於伊雒荆讒賊於中廡兮選呂管於
榛薄叢林之下無怨士兮江河之畔無隱夫三苗之徒
以放逐兮伊臯之倫以充廬今反表以爲裏兮顛裳以
爲衣戚宋萬於兩楹兮廢周邵於遐夷却騏驥以轉運

兮騰驢羸以馳逐蔡女黜而出帷兮戎婦入而綵繡服
慶忌囚於阱室兮陳不占戰而赴圍破伯牙之號鐘兮
挾人箏而彈緯藏璿石於金匱兮捐赤瑾於中庭韓信
蒙於介冑兮行夫將而攻城莞芎棄於澤洲兮鮑蠶蠹
於筐篋麒麟奔於九臯兮熊羆羣而逸囿折芳枝與瑀
華兮樹枳棘與薪柴掘荃蕙與射干兮耘藜藿與蘘荷
惜今世其何殊兮遠近思而不同或沈淪其無所達兮
或清激其無所通哀余生之不當兮獨蒙毒而逢尤雖
蹇蹇以申志兮君垂差而屏之誠惜芳之菲菲兮反以

茲爲腐也懷椒聊之藹藹兮乃逢紛以罹諾
歎曰嘉皇旣歿終不返兮山中幽險郢路遠兮讒人譏
譏孰可愬兮征夫罔極誰可語兮行吟累歎聲喟喟兮
懷憂含戚何佗佗兮

右愍命

冥冥深林兮樹木鬱鬱山參差以嶮巖兮阜杳杳以蔽
日悲余心之惛惛兮日眇眇而遺泣風騷屑以搖木兮
雲吸吸以湫戾悲予生之無歡兮愁倥傯於山陸且徘徊
徊於長阪兮夕彷徨而獨宿髮披披以鬢鬢兮躬劬勞

而瘖悴竟恹恹而南行兮泣霑襟而濡袂心嬋媛而無
告兮口噤閉而不言違郢都之舊閭兮回湘沅而遠遷
念余邦之橫陷兮宗鬼神之無次閔先嗣之中絕兮心
違惑而自悲聊浮遊於山陬兮步周流於江畔臨深水
而長嘯兮且倘佯而汎觀興離騷之微文兮冀靈修之
壹悟還余車於南郢兮復往軌於初古道修遠其難遷
兮傷余心之不能已背三五之典刑兮絕洪範之辟紀
播規榘以背度兮錯權衡而任意操繩墨而放棄兮傾
容幸而侍側其棠枯於豐草兮藜棘樹於中庭西施斥
於北宮兮妣惟倚於彌楹烏獲戚而驂乘兮燕公操於
馬圉蒯瞶登於清府兮咎繇棄於桎外蓋見茲以永歎
兮欲登階而狐疑乘白水而高驚兮因徙弛而長詞
歎曰倘佯墟阪沿水深兮容與漢渚滟淫兮鍾牙已
死誰爲聲兮纖阿不遇焉舒情兮曾哀悽欷心離離兮
還顧高丘泣如灑兮

右思古

九思

九思者王逸之所作也自屈原終沒之後忠臣介士

遊覽學者讀離騷九章之文莫不愴然心爲悲感高
其節行妙其麗雅至劉向王褒之徒咸嘉其義作賦
騁辭以讚其志則皆列於譜錄世世相傳逸與屈原
同土共國悼傷之情與凡有異竊慕向褒之風作頌
一篇號曰九思以裨其辭未有解脫故聊訓誥焉

悲兮愁哀兮憂天生我兮當闇時被詠諧兮虛獲尤心
煩憤兮意無聊嚴載駕兮出戲遊周八極兮歷九州求
軒轅兮索重華世旣卓兮遠眇眇握佩玖兮中路躇羨
臯繇兮建典謨懿風后兮受瑞圖愍余命兮遭六極委

玉質兮於泥塗遽僮遑兮驅林澤步屏營兮行丘阿車
軌折兮馬虺頽憊悵立兮涕滂沱思丁文兮聖明哲哀
平差兮迷謬愚呂傳舉兮殷周興忌嚮專兮郢吳虛仰
長歎兮氣餽結悒殞絕兮活復蘇虎兕爭兮於廷中豺
狼鬪兮我之隅雲霧會兮日冥晦飄風起兮揚塵埃走
鬯定兮作東西欲竄伏兮其焉如念靈閨兮與重深輒
願竭節兮隔無由望舊邦兮路委隨憂心情兮志勤劬
寃焚熒兮不遑寐日眩眩兮寤終朝

右逢尤

令尹兮警警羣司兮譴譴哀哉兮涵涵上下兮同流菽
藟兮蔓衍芳藹兮挫枯朱紫兮雜亂曾莫兮別諸倚此
兮巖穴永思兮窈悠嗟懷兮眩惑用志兮不昭將喪兮
玉斗遺失兮鈕樞我心兮煎熬惟是兮用憂集慕兮九
旬退顧兮彭務擬斯兮二蹤未知兮所投謹吟兮中野
上察兮璇璣大火兮西睨攝提兮運低雷霆兮碾礧電
霰兮霏霏奔電兮光晃涼風兮愴悽鳥獸兮驚駭相從
兮宿棲鴛鴦兮嗷嗷狐狸兮嶽嶽哀吾兮介特獨處兮
罔依螻蛄兮鳴東蝨蠶兮號西戴綠兮我裳蠲入兮我

懷蟲豸兮夾余惆悵兮自悲佇立兮怵怛心結縉兮折
摧

右怨上

周徘徊兮漢渚求水神兮靈女嗟此國兮無良謀女詘
兮諛讓鸚雀列兮譁謹鳩鵠鳴兮聒余抱昭華兮寶璋
欲銜鬻兮莫收言逝邁兮北徂叫我友兮配耦日陰暄
兮未光閬哨霏兮靡暗紛載驅兮高馳將諮詢兮皇羲
遵河臯兮周流路變易兮時乖瀉滄海兮東逝沐盥浴
兮天池訪太昊兮道要云靡貴兮仁義志欣樂兮反征

就周文兮邠岐乘玉英兮結誓日欲暮兮心悲惟天祿
兮不再背我信兮自違踰隴堆兮渡漠過桂車兮合黎
赴崑山兮馬駮從盧敖兮棲遲吮玉液兮止渴齧芝華
兮療饑居嶮廓兮眇疇遠梁昌兮幾迷望江漢兮濩浩
心繫豢兮傷懷時朏朏兮且旦塵漠漠兮未晞憂不暇
兮寢食既增歎兮如雷

右疾世

哀世兮睭睭譏譏兮嗌喔衆多兮阿媚醜靡兮成俗貪
枉兮黨比貞良兮笑獨鵠竄兮枳棘鶉集兮帷幄蕪藜

兮青菘橐本兮萎落覩斯兮僞惑心爲兮隔錯逡巡兮
圃藪率彼兮吟陌川谷兮淵淵山岳兮砢砢叢林兮嶮
嶮林榛兮岳岳霜雪兮漼漼冰凍兮洛澤東西兮南北
罔所兮歸薄庇廕兮枯樹匍匐兮巖石踉跄兮寒局數
獨處兮志不申年齒盡兮命迫促魁纍擠摧兮常困辱
含憂強老兮愁無樂鬚髮蔓頓兮顛鬢白思靈澤兮一
膏沐懷蘭英兮把瓊若待天明兮立躑躅雲濛濛兮電
儵爍孤鷓鷯兮鳴啁啁思怫鬱兮肝切剝忿悁悒兮孰
訴告

右憫上

悼屈子兮遭厄沈玉躬兮湘汨何楚國兮難化迄于今
兮不易士莫志兮羔裘競佞諛兮讒閱閱指正義兮爲
曲訛璧玉兮爲石鵲鵬遊兮華屋鷓鴣棲兮柴蔟起奮
迅兮奔走違羣小兮謏詢載青雲兮上昇適昭明兮所
處躡天衢兮長驅踵九陽兮戲蕩越雲漢兮南濟秣余
馬兮河鼓霄霓紛兮晻翳參辰回兮顛倒逢流星兮問
路顧指我兮從左倥偬莆兮直馳御者迷兮失軌遂踣
達兮邪造與日月兮殊道志闕絕兮安如哀所求兮不

耦攀天階兮下視見鄢郢兮舊宇意逍遙兮欲歸衆穢
盛兮杳杳思哽噎兮詰訕涕流瀾兮如雨

右遭厄

嗟嗟兮悲夫殺亂兮紛拏茅絲兮同綠冠履兮共絢督
萬兮侍宴周邵兮負芻白龍兮見射靈龜兮執拘仲尼
兮困厄鄒衍兮幽囚伊余兮念茲奔遁兮隱居將升兮
高山上兮有兮猴猿欲入兮深谷下有兮虺蛇左見兮鳴
鵙右睹兮呼梟惶悸兮失氣踴躍兮距跳便旋兮中原
仰天兮增歎菅蒯兮野莽藿葦兮干眠鹿蹊兮躑躅貓

貉兮蟬蟬鷓鴣兮軒軒鷓鴣兮甄甄哀我兮寡獨靡有
兮匹倫意欲兮沈吟迫日兮黃昏玄鶴兮高飛增逝兮
青冥鷓鴣兮嗒嗒山鵲兮嚶嚶鴻鷓兮振翅歸鴈兮于
征吾志兮覺悟懷我兮聖京垂屣兮將起跼埃兮須明

右悼亂

惟昊天兮昭靈陽氣發兮清明風習習兮蘇煖百草萌
兮華榮董荼茂兮敷疏蘅芷彫兮瑩嫺愍貞良兮遇害
將天折兮碎糜時混混兮澆饋哀當世兮莫知覽往昔
兮俊彥亦詘辱兮係纍管束縛兮桎梏百貨易兮傳賣

遭桓繆兮識舉才德用兮列施且從容兮自慰玩瑟書
兮遊戲迫中國兮迨陘吾欲之兮九夷超五嶺兮嗟峨
觀浮石兮崔嵬陟丹山兮炎野屯余車兮黃支就祝融
兮稽疑嘉已行兮無爲乃回竭兮北逝遇神嬈兮宴娛
欲靜居兮自娛心愁感兮不能放余轡兮策駟忽風騰
兮雲浮蹠飛杭兮越海從安期兮蓬萊緣天梯兮北上
登太一兮玉臺使素女兮鼓簧乘戈蘇兮謳謠聲噉詭
兮清和音晏衍兮要姪咸欣欣兮酣樂余眷眷兮獨悲
顧童華兮太息志戀戀兮依依

右傷時

旻天兮清涼玄氣兮高朗北風兮潦烈草木兮蒼唐
呖兮噍噍唧蛆兮穰穰歲忽忽兮惟暮余感時兮悽愴
傷俗兮泥濁矇蔽兮不章寶彼兮砂礫捐此兮夜光椒
瑛兮涅汗菘耳兮充房攝衣兮緩帶操戈兮墨陽昇車
兮命僕將馳兮四荒下堂兮見蠹出門兮觸螽巷有兮
蚰蜒邑多兮螳螂賭斯兮嫉賊心爲兮切傷惋念兮子
胥仰憐兮比干投劍兮脫冕龍屈兮蜿蟺潛藏兮山澤
匍匐兮叢攢窺見兮溪澗流水兮汙汙鼃鼃兮欣欣鱸

鮎兮延延羣行兮上下駢羅兮列陳自恨兮無友特處
兮熒熒冬夜兮陶陶雨雪兮冥冥神光兮頰頰鬼火兮
熒熒修德兮困控愁不聊兮遑生憂紆兮鬱鬱惡所兮
寫情

右哀歲

陟玉巒兮逍遙覽高岡兮峴峴桂樹列兮紛敷吐紫華
兮布條實孔鸞兮所居今其集兮惟鴉烏鵲驚兮啞啞
余顧瞻兮怊怊彼日月兮闇昧障覆天兮稜氛伊我后
兮不聰焉陳誠兮効忠攄羽翮兮超俗遊陶遨兮養神

乘六蛟兮蜿蜒遂馳騁兮陞雲揚華光兮爲旗秉電策
兮爲鞭朝晨發兮鄢郢食時至今增泉繞曲阿兮北次
造我車兮南端謁玄黃兮納贊崇忠貞兮彌堅歷九宮
兮徧觀睹祕藏兮寶珍就傳說兮騎龍與織女兮合婚
舉天畢兮掩邪設天弧兮射姦隨真人兮翱翔食元氣
兮長存望太微兮穆穆睨三階兮炳分相輔政兮成化
建烈業兮垂勲日警警兮西沒道遐迥兮阻歎志穉積
兮未通悵敞罔兮自憐

右守志

辭曰天庭明兮雲霓藏三光朗兮鏡萬方斤蠹蟬兮進
龜龍策謀從兮翼機衡配稷契兮恢唐功嗟英俊兮未
爲雙

楚辭附覽卷下終

國



